

REGIONAL NEWS

HEADLINES:-

1. Churachandpur leh Aizawl inkarah tunkar Zirtawpni hian helicopter thlawh tantir leh theih beisei a ni.
2. Sorkar laipui chuan Mizoram a raltlan mek Myanmar mite biometric hmanga chhinchhiah hna kalpui tur hun chu December thla thlengin a pawtsei.
3. Prime Minister Narendra Modia chaun ramchhunga thilsiam chhuah Make in India hmalakna chuan khawvel eibar dinhmun nasa takin a tihmasawn a ti.
4. Parliament budget session lo awm tur pualin sawrkar laipui chuan Pathianni khian party tin aiawh inhmukhawm a ko.

<><><>

COPTER

Churachandpur leh Aizawl inkara helicopter thlawhtir leh turin ruahmanna siam mek a ni a, tunkar Zirtawpni hian thlawh tantir theih beisei a ni.

Manipur sorkar Transport department chuan kumin June ni 27 a an tihtawp tak Churachandpur leh Aizawl inkar a helicopter service chu chawlhkar khata vawi khat ni lovin vawi hnih thlawhtir turin hriattirna a chhuah a. Tun kar Thawhtanni, July ni 15 atanga thlawk tan tura tih a nih laiin Mizoram sorkara Civil Aviation lam an hriattir tlai a. Thlawh tan tur ni atana ruat Thawhtanni hma Pathianni-a an hriat ve chauh avangin an inbuatsaih hman ta lova. Tunah hian Zirtawpni, July ni 19 a thlawk tan hman ngei tura ruahmanna siam a ni. Ruahman dan chuan Thawhtanni leh Zirtawpni apiangin helicopter hi a thlawk thin dawn a. Churachandpur atanga lo thlawk hi Aizawl Mualpui helipad-ah a lo tum ang a. Haw lamah Lengpui tumhmun tlawh hmasa-in Churachandpur-ah a kir leh thin dawn a ni. Ministry of Home Affairs remtihna-in nikum September ni 27 khan Churachandpur leh Aizawl inkar helicopter service hi a thlawk tan a, kumin June ni 27 khan tihtawp lailawk niin tunah hian chhonzawm a ni leh dawn ta a ni. Helicopter hman man za zela 75 hi MHA-in a tum (subsidise) sak a ni.

Helicopter service hi a bik takin Churachandpur district leh Manipur tlangrama chengte tan a tangkai hle a. Imphal thlawhna tunhmun hnai hle mah se tlangmite tan kal ngam a nih loh bakah phai leh tlang ram mite an inthen fel a, an inawmpawlh tawh loh avangin kal chi a ni lova. Lirthei hmanga kalin Churachandpur leh Aizawl inkar hi km 330 vel a ni a, kawng a chhiat avangin darkar 15 vel kawngah hun an hmang thin. Chutiang chu an dinhmun a nih avangin Manipur pawn lama enkawl tur damlo phurh chhuah pawh a hautak hle a. Helicopter a thlawh leh chuan an harsatna tam tak a sukiang dawn a ni.

<><><>

LAWNGTLAI DC ORDER

Lawngtlai District Magistrate Cheemala Siva Gopal Reddy chuan Bharatiya Nagarik Suraksha Sanhita (BNSS) in thuneihna a pek hmangin Lawngtlai District ah Tuialhthei khuahkhirhna thupek a chhuah.

Lawngtlai District Magistrate chuan Lawngtlai District chhung a Filling Station te chu tuialhthei a man bithliah ai a sanga hralh chhuak lo turin a ti a. Myanmar leh ramdangah sumdawnna kaihnawihah tuialhthei pekchhuah a remti lova, Lawngtlai District chhungah dan lova tuialhthei lei leh phurh luh a khap bawk a. Thupek zawmlo chu dan anga hrem an nih tur thu District Magistrate thupek chhuahah tarlan tel a ni bawk.

Central YLA in Myanmar a Tuialhthei thawn luh tur an dan chu chhonzawmzel an tum thu an sawi a. Central YLA in dan kalha Rakhine State a Tuialhthei lut tur an dan chu Sorkar tha tichak turin chhonzawm zel an tum thu an sawi a, an thiltih chu ramchhung mite inhrek tumna a ni lo tih an sawi nawn a. Lawngtlai District Magistrate in tuialhthei khuahkhirhna thupek a chhuah chu lawmawm an tih thu sawiin, ram pawna tuialhthei hralh chhuah chungchanga inhmuh thiam lohna awm ni a langte chingfel turin Central Young Lai Association leh Mara Thyutlia Py, General Headquarters, Siaha nen dawhkan kila inbiak thuai an tum niin Central YLA hruaitute chuan an sawi.

Rakhine lam mi, Lawngtlaia tangkhangte'n an ram an pan theih na'n YLA chuan ruahmanna a siam mek a, ramdang nena tuialhthei ni lo, thildangah indawrna awmze nei zawka kalpui a nih theih na'n an huamchhungah ruahmanna siam an tum a ni.

<><><>

BIOMETRIC ENROLMENT

Sorkar laipui chuan Mizoram a raltlan mek Myanmar mi 33,800 chuangte biometric hmanga chhinchhiah hna kalpui tur hun chu December thla thlengin a pawtsei.

Home department atanga thu dawn danin Myanmar raltlan Mizorama an sahimna atana awm mekte biometric hmanga chhinchhiahna tur atan hian sorkar laipui thu hnukung nghah mek a ni a. A hma lama Ministry of Home Affairs (MHA)-in biometric enrolment portal a siam chu ramdangmi India rama rawn lut, an rama thawn let turte tana duan a nih avangin siamthat a ngaih thu home department chuan an sawi a. Siamthat rawtna an thawn hi MHA lam chuan an la rawn chhang lo. Union Home Minister Amit Shah chuan chief minister Pu Lalduhoma hnenah Myanmar raltlante chu an rama muanna tluan tling a awm hma chuan thawn kir an nih loh tur thu a lo tiam tawh a. Chuti chung chuan thawn kir turte puala biometric enrolment portal an rawn duan leh si avangin siamtha tura an ngenna chu Mizoram sorkarin a ngahak mek a. June ni 18-a council of ministers thukhawm chuan sorkar laipui-in Myanmar raltlante biometric hmanga chhinchhiah tura thu thar a rawn neih leh chuan kalpui nghal mai ni se tiin an lo rel tawh a ni.

Myanmar raltlan an tam lai khan mimal tin chanchin (biographic data) lak a lo ni tawh a, mi 35,011 te chu chhinchhiah an ni a. Mi 28,635-te chu identity card pek an lo ni tawh bawk. Kar kal ta chung khan Mizorama awm mek Myanmar raltlan zinga 12-te chuan an awmna Kolasib an chhuahsan ni a hriat a ni a. Myanmar-ah an kir leh nge Mizoram pawn hmun dangah an kal tih hriat chian a la ni lo. Heti hian tun dinhmunah Mizoramah Myanmar raltlan 33,823 an awm mek a. An

zinga 10,141 hi mipa an ni a, hmeichhia 10,791 awmin naupang 12,891 an awm bawk a ni.

<><><>

HEROIN HAUL

Vawiin khan Chawngtlai-ah scooty pakhat atangin heroin gram 253 an man a, scooty khalhtu leh a mi phurh hi man an ni.

Vawiin chhun dar 12:10 vel khan Chawngtlai Branch YMA mi, Central YMA Short Film Competition atana Film Shooting nei lai te chuan Scooty pakhat atangin heroin gram 253 a rit cheng Nuai 7 hu an man a. Heroin hi sahbawn bawm ah dah niin, bawm 20 ah khung a ni. Scooty khalhtu leh a mi phurh te hi kum 17 a upa ve ve niin, Ngur khua, Champhai District-a cheng ve ve niin an in sawi a, an pahnih hian Khawzawl Police kutah hlan nghal an ni. Chawngtlai Branch YMA Member te hian an Film siamna-ah hian sipai thawmhnaw nen an inthuum chu heroin phurtu scooty a chuangte chuan sipai emaw tiin an hlau a. Film siam tum YMA member te an tlan pelh hma hian tlan let leh in, an ruihhlo phurh chu an thukru a, an thuhruk lai chu YMA mite hian lo hmu phakin an va man zui ta a ni.

YMA member te hian thil tha lo phur ni ngeia an ngaih avangin Khawzawl Police te an hriattir nghal a, Khawzawl Police te hian an thil man te hi enfiah in, heroin a ni tih finfiah a nih hnuah thubuai ziaklut nghalin, scooty khalhtute leh a phur te hi Khawzawl police station ah dahluh nghal an ni. Heroin phurtute hian an heroin phurh chu Champhai Zote atanga Lunglei Zobawk a thlen tum an nih thu an sawi.

<><><>

PALMOIL EXTRACTION PLANT

Nimin khan Mamit district-a Tuidam khua-ah palmoil hmanga eirawngbawl na tel her chhuahna khawl chu her chhin a ni.

Mamit District Cooperation Office huaihawtin Mamit District chhunga a hmasa ber atan Tuidam khua-ah Tuidam Oil Palm Farmer Cooperative Society Ltd. te tana Palm Oil hmanga eirawngbawl na tel her chhuahna khawl, her chhina hun hman a ni a. Mamit MJA leh District Information and Public Relations Department-ten he hun hi an hmanpui. Mamit District Cooperative Officer Pu Lalthangfala chuan palmoil herna khawl chuan ni khatah palmoil quintal 10 a her chhuah theih dawn bakah ni khatah palmoil hriak litre 200 leh cake kg. 300 a her chhuah theih tur thu a sawi a. Pu Lalthangfala chuan palmoil her chhuahna khawl bun na'n leh a in sak na'n cheng nuai 22 leh sing 5 an hmanral tawh thu a sawi a. Palmoil her chhuahna khawl chu hman theih a peih fel a nih hunah chuan a chingtute'n an thar chhuah te chu tuna an hralhna rate aia hlawk zawk, a let thuma hlawka an hralh theih tur thu he hun ah hian a sawi a ni.

Mamit District chhungah hian Cooperative Society 115 awm mekin, hmalakna hrang hrang an kalpui mek zel a ni.

<><><>

INDIGENOUS GAMES

Doordarshan Kendra, Aizawl leh Mizoram Indigenous Games hruaitute bul tumin vawiin khan Champhai Kahrawt Veng khelmualah YMA Branch hrang hrangte tan Mizo Infiamna hmanga inelna buatsaih a ni.

Mizoram Indigenous Games Competition-2024 champhai district a buatsaihah hian Mizo infiamna chi hrang hrang, Inbuan, insuknawr, insaihruipawh, inkawibah leh inarpathai hmanga inelna buatsaih a ni a. Champhai District YMA branch hrang hrang atangin mi thahnem tak an tel thei a, naktukah chhonzawmin a tlai lamah khar a ni ang. He inelna neih lai hi DDK chuan 'live' in a pechhuak a ni.

<><><>

BOOK RELEASE

'Hripui Leng Kara Hmangaihna' tih lehkhabu chu vawiin khan MJA President Pu C. Lalrambuatsaiha'n Emerald Hotel, Treasury Square ah a tlangzarh.

He Lehkhabu hi hri (Covid-19) len lai a Khawvel pumpui huap Zofate puala thawnthu tawi inziahsiaik 'The Writer's Club' leh 'Laisuih Zirbing Rûn' buatsaih a ni a. Thawnthu tawi 100 atanga a tha zual sawmhni thlan chhuah bu khata khawrpum a ni a. 'Hripui Leng Kara Hmangaihna' tih lehkhabu hi KC Vanlalruata buaisaih a ni a. He hun ah hian Thawnthu Tawi Inziahsiaik result puan leh lawmman semna hman nghal a ni a, lawmman pawisa fai leh thuziah keng telin lawman dawngtu te hian lehkhabu tlangzarh hi an dawng vek bawk a ni.

<><><>

PM HAILS MAKE IN INDIA

Prime Minister Narendra Modia chaun ramchhunga thilsiam chhuah Make in India hmalakna chuan khawvel eibar dinhmun nasa takin a tihmasawn a ti. Social media-a a thu dahah Pu Modia chuan Make in India hlawhtlinna chuan India chu eibar dinhmun chu khawvel dawhsanah a hlang kai ati a. India rama thilsiamte chu khawvel ram hrang hrangah a lar chho zel a ni a ti bawk.

<><><>

PARLIAMENT

Parliament budget session lo awm tur pualin sawrkar laipui chuan Pathianni khian party tin aiawh inhmukhawm a ko. He inhmukhawmah hian sawrkar chuan political party-te chu thawhho puiah sawim Parliament in hnih rorel tluang taka a kal theih nan thawhpuih a sawm dawn a ni.

Parliament budget session hi tun thla ni 22 atanga thlaleh ni 12 thleng neih tur a ni a. Union Budget hi tun thla ni 23 ah pharh a ni ang. Tun tuma budget pharh tur hi Narendra Modia sawrkar term thumnaa a hmasa ber tur a ni a. Thla hmasa khan President Draupadi Murmu-i chuan Parliament inhnih member thukhawm hmaah tun tuma budget pharh tur hi sawrkar policy zau tak leh hmathlir pawimawh tak tak chuanna tur a ni a ti.

<><><>

OMAN

Oman-a tuialthwei phur lawng chesualah a chungah hnathawk India mi 13 telin mi 16 chin hriat lohin an bo. Oman Maritime security centre sawidanin nimir khan he bungraw lawng hi a pil a. Lawng hming hi Prestige Falcon tih niin Oman industrial port of Duqm kiangah a pil a. Chetsualna thlen chhan hi hriat ala ni lo.

Lawng chesual hi Yemeni port of Aden pana kal a ni a. Chhanchhuah hna ngawrh taka thawh niin tumah chanchhuah an la awm lo a ni.

<><><>